

Date – 25/02/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Vawiin Assembly Session thukhawmah The Mizoram State University (Amendment) Bill, 2026 chu lungrual taka pawm a ni.
2. Agriculture Minister Pu PC Vanlalruata'n tun thla February ni 2 atangin sorkarin sawhthing lei tan tum mahse tun dinhmunah SCC 4 atang chauhin lei a la nih thu House a hrilh.
3. Aizawl Day 2026 chu a vawili na vawiin khan Aizawl Lammual ah hman a ni.
4. Prime Minister Narendra Modia chuan ni hnih cham turin vawiin tlai khan Israel a thleng.

<><><>

MIZORAM STATE UNIVERSITY BILL

Vawiin Assembly Session thukhawmah The Mizoram State University (Amendment) Bill, 2026 chu lungrual taka pawm a ni.

Bill puluttu Minister Dr. Vanlalhlana chuan nikum 2025 March ni 4-a Mizoram Assembly Legislative-in The Mizoram State University Bill 2025 a pass hnu khan Mizoram State University din chhoh a nih theih nan hmala nghalin, hnathawktu tur post siam nghal a ni a, Post siam zinga a tul zualte lak nan advertisement pawh chhuah nghal a ni a ti a, Mizoram State University headquarter atan Aizawl Luangmuala Geology and Mining Department office chu tihfel tura hmalak a nih laiin, Bill pass a nih hma leh hnuah Lunglei, Champhai, leh Mamit atang te in representation dawn a nih avangin NGO leh bialtu MLA te titi pui an nih hnuah kum 2025 November ni 17-a Council of Minister thukhawm chuan ngun taka a ngaihtuahin Mizoram State University headquarter chu Lungleia dah turin a rel a, nikum November ni 20 khan Chief Minister chuan Lungleiah Mizoram State University headquarter dah a nih tur thu a puang ta a ti.

He bill chungchangah hian enfiah tur tam tak a awm avangin Bill drafting committee din thar lehin, Act awmsa an ennawn a, Council of Minister phalna lak a nih hnuah vawiin hian Assembly Sessionah pharh a ni ta a. He bill kaihnawiha an ngaihtuanaa lian ber chu regional imbalance a nih thu sawiin, regional imbalance tihziaawm nan Lungleiah dah a nih thu sawiin, Bill tharah hian Section pathumah tihdanglam a awm tih a sawi a ni.

He bill hi Lunglei West Bialtu Pu T Lalhlipua, Lunglei South Bialtu Pu Lalramliana, Lunglei North Bialtu Pu V. Malsawmtluanga leh Lunglei East Bialtu Pi Lalrinpuii, te chuan he bill hi an thlawp thu sawiin, Aizawl-ah zirna sang tha tak tak a awm tawh avangin leh kum 2011 chhiarpuih Aizawl tih lohah Lunglei district-a mipui cheng zat an tam fal bawh avangin Lungleia Mizoram State University dah tura Council of Minister in an rel chu lawmawm an tih thu an sawi a. Champhai North bialtu Pu H. Ginzalala, leh Champhai South bialtu Clement Lalhmingthanga leh East Tuipui bialtu Pu Ramthanmawia te chuan Mizoram State University chu Champhaia dah tura an ngen chungah Lungleia Mizoram State University dah a ni tur chu an lawmpui rualin, a lehpekah chuan Champhai District tan Mizoram sorkar tan thil ropui tak a tih sak ve tawh an beisei an ti a,

Mizoram sorkarin hmasawna chu Aizawl-ah chauh ni lova a semzai chu lawmawm an tih thu an sawi bawh a ni.

Leader of Opposition Pu Lalchhandama Ralte chuan Lungleiin Amendment chauha Mizoram State University an nei tur chu an thlawp lova, Aizawl tan tura siam tawh Mizoram State University bill chu sut-in bill thar hlak siamsak turin an phut tih a sawi a ni.

Byte: Leader of Opposition

He bill hi member 20 chuangin an sawiho hnuah House chuan a pawm a ni.



GINGER

Agriculture Minister Pu PC Vanlalruata'n tun thla February ni 2 atangin sorkarin sawhthing lei tan tum mahse tun dinhmunah SCC 64 zinga 4 atang chauhin lei a la nih thu House a hrilh.

He thu hi vawiin Assembly thutkhawma Lawngtlai West Bialtu Pu Ngunlianchnunga zawhnaa chhannaah sawiin, Agriculture Minister chuan sawhthing lei tia sawi chu sorkarin loneitute hnen atanga lei ni lovin, support price a pe tihna ni a ti a, hetihlai hian nikumah sawhthing rate a chhiat em avangin sorkar chuan loneitute chu lei sak in Sairang-a buffer stock-ah a dah sak a, sum sen so a san avangin kuminah sorkarin a tlin tawh lo tih sawiin Siliguri leh Delhi Mandi rate milin District tinah sawhthing rate tur Floor Price siamin, kg-ah cheng 40 atanga cheng 45 inkar floor price an siam a ti a, sawhthing leitu tur ten an dawn ve reng avangin kg-ah cheng 30 atanga cheng 35 ah an tihnam a, tun dinhmunah Secondary Collection Centre (SCC) 64 zinga 4- Khuangleng SCC, Cherhlun SCC, West Phaileng SCC leh Tuipang SCC-ah te sorkar floor price angin sawhthing hralh mek tih a sawi.

Agriculture Minister chuan Mizoram sawhthing chu tha bikin, chemical tel mang lo, organic tluk a nih avangin miin an duh bik hle a ti a, Chief Minister Pu Lalduhoma hovin NITI Aayog hotute nen Mizoram thar chhuah sawhthing sawiho a ni tawh a, Mizoram sawhthing thar chhuah quality tha tak chu ramchhung mai ni lovin khawvelin a hre chho mek tih sawiin sawhthing chu man tlawma hralh phal lo turin loneitute pawh an zirtir mek tih a sawi a ni.

Zawh belhna chhangin Minister chuan sawhthing-ah 3rd party an inrawlh reng tih sawiin, tun dinhmunah Burma sawhthing lo lut mek a awm a ti a, hemi venpui tur hian Home Department hnenah ngenna an thlen tawh a ti a, ram thenawm Bangladesh chu sawhthing lei nasa tak ni thin mah se, an ram a buai tak avang leh kawng that loh avangin kuminah chuan Bangladesh lamah sawhthing hralh chhuah tum a nih loh thu a sawi a. Hei bakah hian kum 2026-2027 chhung hian Sorkar chuan thlai thlan chhuah bikte sawhthing, hmarcha, ruahmanna a siam a ni a, kum 2026-2027 chhungin Agriculture & Farmers' Welfare Department hnuaiah cheng vbc 150 dah tum a nih thu a sawi bawk.

<><><>

HORTICULTURE MINISTER

Horticulture Department Minister Pu C. Lalsawivunga'n Mizoram intodelhna hmanrua atan Sapthei chin beihpui thlak an tum thu a sawi.

Assembly thutkhawma zawhna leh chhanna hunah he thu hi sawiin Horticulture Minister Pu C. Lalsawivunga chuan Mizorama sapthei chuan chungnun bik na riau an nei a ti a, state dang ten ching ve mahse Mizoram-a sapthei tharchhuah te an tluk loh thu sawiin, nikum atangin pilot project siam ni tawhin District hrang hrang Champhai, Khawzawl, Serchhip, Saitual leh Aizawl ah beihpui thlak a nih tur thu a sawi a, Mizorama sapthei chin chu India ram hmun dangah a awm ve loh avangin hram ei leh bar hmasawna leh kuthnathawk tute tan intodelhna hmanrua tha tak leh kawng pawimawh tak anih theih an beisei thu a sawi a, India ramah a market a awlsam mai bakah khawvela huap pawh market harsatna a awm loh avangin Mizoram ti hmingtha thei tur khawpa Sapthei ah hian beihpui thlak an tum thu a sawi a ni.

Byte : Horticulture Minister

Hei bakah hian Post Harvest Management hnuaiah kuthnathawktute tan pack house leh preservation unit chu thlai thar tamna District hrang hrang ah dah sak vek tawh a nih thu a sawi a, sorkar in thlai chi lei tura ruahmanna a siam mek thu sawiin thlai chi lei nan hian cheng nuai 60 dah anih thu a sawi bawk.

Hei bakah hian nikum lama Cyclone Remal avanga thlai chingtuten harsatna an tawh chi hrang hrang puhrukna atan NDRF atangin atan cheng nuai 29 leh SASCI atangin cheng vbch 3 chuang zangnadawma an dawn tawh thu a sawi bawk.

<><><>

AIZAWL DAY

Aizawl Day 2026 chu a vawili na vawiin khan Aizawl Lammual ah hman a ni a, Aizawl Mayor Pu Lalrinenga Sailo chuan he hun hi a hmanpui.

Aizawl Mayor Pu Lalrinenga Sailo chuan Aizawl hi Lalsavunga khua tih ni thin- in kum 1890 ah khawpui anga din tan a ni a, Aizawl Fort tih a ni a, official a Aizawl din tan ni a puan a ni a ti. AMC in Aizawl dincham pha ah a pawm avangin kum 2023 atang khan February ni 25 apiangin Aizawl Day hi hman turin Board of Corporation meeting chuan a rel thu sawiin kumin hi a vawili lawmna na a ni a ti.

(BYTE)

Aizawl Day hman a nihna chhan chu Aizawl khawpui hi kum za chuang khawpui sawrkar nei lovin a awm tawh a, state dang khawpui te chuan kum za chuang municipality neiin nasa taka hma a sawn hnuin, kum 2010 khan Aizawl Municipal Council din tan ani a, kum 2015 ah corporation ah hlan kai niin Aizawl Municipal Corporation tih niin counsellor te pawh corporator tih a thlak a ni a ti a, khawpui dang te umin theihtawpin AMC chuan tan la in Aizawl khawpui faina kawngah Local Council te nen thawk hovin nasa takin hma an la a ti.

Kan corr report lo ngaithla ang.

Aizawl Day lawmna-ah hian pawl leh mimal 94 hnenah lawmman leh chawimawina hlan a ni a. International leh National level chawimawinadawng, Aizawl tihmingthatu mi 21 hnenah Aizawl Day Award sem a ni a, Local Council tha 10 thlanchhuah te hnenah lawmman pek a ni a, faina kawnga thawk tha pawl leh huho 12 leh mimal 35 hnenah chawimawina hlan a ni a. Sanitation workers tha thlanchhuah 6 leh bawlhhlawh phur motor khalhtu tha 10 thlanchhuahte hnenah chawimawina hlan a ni bawk.

Aizawl Day 2026 ah hian eitur leh thil chi hrang hrang zawrhna dawr hawn a ni a, Concert te pawh huaihawt a ni bawk a ni. Aizawl Day pual hian Mayor's Cup - Inter Futsal Tournament khelh mek a ni a. Aizawl day lawmna atan hian ni 23 Feb 2026 khan NHM, Health Department te nena tanghoin bawlhhlawh sawngbawltute tan One-Day Health Checkup, SWMC, Tuirialah buatsaih a lo ni tawh bawkin, Aizawl Day hian ni 27 thleng a awh ang. BJP Mizoram thalai hruaitute chuan Aizawl Day pual hian Aizawl Lei tihfai hnatlang neih a ni. Hruaia

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

NCERT

NCERT pawl 8 zirlaibua judiciary-ah hlemhletna awm anga tarlan chu Supreme Court chuan a ngai thutak hle. Chief Justice Surya Kant leh Justice Joymalya Bagchi leh Vipul M.Pancholi te awmna bench chuan hemi chungchang hi an ngaihtuah nghal a. Senior Advocate Kapil Sibal chuan zirlai pawl 8 te hnenah judiciary-a hlemhletna awm zirtir ani chu a thil pawl tak anh thu a sawi a. Bench chuan hetiang an hmai ti bal thei zawnga zirtirna awm an phal loh thu an sawi a ni. NCERT Social Science pawl 8 zirlaibua hian ramchhunga court rorelna judiciary eiruknate, thubuai tikhawtlai tam tak a awm thu leh judge an indaihloh nasat thu a chuang a ni.

<><><>

PM IN ISRAEL

Prime Minister Narendra Modia chuan ni hnih cham turin vawiin tlai khan Israel a thleng. Tun tum hi Israel a tlawh vawi hnihna a ni a. A cham chhung hian Israel Prime Minister Benjamin Netanyahu nen India-Israel Strategic Partnership

chungchang an sawidun dawn a. Hei bakah hian thawhdunna tur huang dang science and technology, innovation, ralthum leh ram venhimna, agriculture, tui sawngbawl, sumdawanna leh eibarzawanna leh mipuite inpawhtawanna tura hmalaknate an sawidun bawk ang.

Hruaitu pahnihte hian an inkar bakah khawvel thilthleng pawimawhte an sawidun dawn bawk a ni.

Israel-a India palai J P Singh-a sawidanin Prime Minister Modia hian Israel Parliament Knesset ah thu a sawi dawn a. India mi zinga Israel Parliament-a thusawi hmasaw ber a ni dawn a ti a. Naktukah PM Modia hian Israel President Isaac Herzog a kawm bawk ang.

